



JUDICIAL SYSTEM MONITORING PROGRAMME  
PROGRAM PEMENTAUAN SISTEM YUDISIAL



## ***Komunikadu Imprensa***

***Periodu : Setembru 2011***

***Publikasaun : 10 Outubru 2011***

### **Tribunál Distrital Oe-cusse Enkoraza Vítima Violénsia Doméstika atu Depoimenta iha Tribunál**

Iha loron 5 Outubru 2011 Tribunál Distritál Oe-cusse hala'o audiénsia julgamentu ba kazu krime violénsia doméstika (kónjuje) ho numeru prosesu 25/Proc/TDO/2011.

Julgamentu ba kazu refere prezidi husi juiz singular Dr. António Helder Do Carmo, husi parte Ministériu Públiku representa husi Dr. Jacinto Babo no parte defeza representa husi Dr. Calisto Tout no Dr. Sebastião Amadu Almeida husi Eskritóriu Defensória Públika.

Buat ne'ebé intresante husi prosesu ida ne'e mak, Tribunál Distritál Oe-cusse, husu ba vítima husi kazu violénsia doméstika atu halo depoimentu hasoru nia kónjuje ne'ebé halo abuzu ka prátika violénsia doméstika hasoru vítima.

Diretór Ezekutivu JSMP, Luis de Oliveira Sampaio haktuir katak '*Tribunál Distritál Oe-cusse halo istória foun iha setór justisa tanbá buka meus atu interpreta provizaun sira iha Kódigu Prosesu Penál ho maneira ida ne'ebé mak neutru no progresivu liu. Ne'e, faze foun ida iha istória setór justisa Timór Léste nian ne'ebé ita hotu merese haksolok no kongratula juiz-da-kauza ne'ebé tenta atu intreprta provizaun sira iha maneria ida ne'ebé komprehensivu liu depoisde tinan barak ita tama iha konfuzo ida konabá interpretaun artigu 125 Kódigu Prosesu Penál.*'

Durante ne'e, tuir observaun JSMP nian iha prátika jurisdisaun hotu, tribunál sira kontinua introduz ka aplika artigu 125 Kódigu Proses Penál (KPP), ba vítima violénsia domestika sira hodi hatuur vítima sira iha pozisaun ida ne'e dilematíku entre hakarak fo depoimentu hodi deskobre lia los no hetan justisa ka hili direitu nonok no absolve alegasaun hasoru sira nia konjuje.

Maibé ba kazu ida ne'e, totalmente diferente tanbá tribunál obriga ka enkoraza vítima sira atu hato'o depoimentu ba kazu ne'ebé vítima apresenta ona ba Ministériu Públiku.

Antes akontese situasaun ne'e, iha loron 4 Outubru 2011, tribunál refere hala'o julgamentu ba kazu krime violénsia doméstika ida, maibé ba kazu ne'e vítima hili direitu nonok ka la halo depoimentu hasoru nia kónjuje.

Relasiona ho situasaun ne'e, tuir observasaun JSMP nian, iha loron 5 Outubru 2011, tribunál halo audiénsia ba kazu violénsia doméstika seluk ne'ebé rejista ho numeru prosesu 25/Proc/TDO/2011. Ba kazu ida ne'e, iha faze alegasaun final, Ministériu Públiku preokupa ho aplikasaun artigu 125 KPP tanbá kazu ne'e partensia ka involve krime ho natureza violénsia domestika. Tanbá ne'e, Ministériu Públiku husu ba tribunál atu buka meius hodi bele deskobre verdade, liu-liu tribunál tenki apresia livremente faktus iha akuzasaun.

Depoizde audiénsia julgamentu remata Tribunál Distritál Oe-cusse halo konsultasaun hodi husu intepretasaun ba artigu 125 KPP ba Tribunál Rekursu. Iha momentu ne'ebá Tribunál Rekursu konfirma verbalmente katak relasiona ho aplikasaun provizaun artigu 125 KPP, durante ne'e Ministériu Públiku hato'o rekursu dala barak ona ba Tribunál Rekursu relasiona ho interpretasaun ba provizaun refere. Tanbá ne'e, Tribunál Rekursu autóriza tribunál sira atu la aplika ka hases tiha artigu 125 KPP ba kazu sira ne'ebé ho natureza violénsia doméstika no enkoraza vítima sira atu fó sira nia depoimentu.

Tuir JSMP nia hanoin katak mesmu ne'e la'os despaxu ekrita husi Tribunál Rekursu, maibé JSMP espera katak ho orientasaun husi Tribunál Rekursu ba autóridade judisiária sira bele lori mudansa significativu ba lalaok sistema judisiáriu iha Timór Léste, tanbá durante ne'e JSMP preokupa dala barak ona konabá aplikasaun artigu 125 KPP ba kazu sira violénsia doméstika nian.

Dala ida tan, JSMP louva no kongratula ba esforsu tomak husi autóridade judisiária ne'ebé iha motivasaun no komitmentu makas hodi hamenus no kombate violénsia hasoru fetu, no JSMP espera katak esperiensia ida ne'e bele aplika mós ka sai referensia iha tribunál distritál sira seluk.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)